

IV. OPOSICIÓNS E CONCURSOS

CONSELLERÍA DE PRESIDENCIA, XUSTIZA E DEPORTES

RESOLUCIÓN do 27 de maio de 2026, da Dirección Xeral de Xustiza, pola que se convoca a provisión, polo sistema de libre designación, dun posto de traballo do corpo de tramitación procesual e administrativa da Administración de xustiza.

De conformidade co establecido nos artigos 524, punto 1, e 526, punto 2, da Lei orgánica 6/1985, do 1 de xullo, do poder xudicial; nos artigos 56 e seguintes do Real decreto 1451/2005, do 7 de decembro, polo que se aproba o Regulamento de ingreso, provisión de postos de traballo e promoción profesional do persoal funcionario ao servizo da Administración de xustiza; e na Resolución do 29 de agosto de 2025, da Dirección Xeral de Xustiza, pola que se aproba a relación de postos de traballo da Secretaría de Goberno e das oficinas de xustiza. Fase III, anúnciase a provisión, polo sistema de libre designación, do posto de traballo cuxa descrición se especifica no anexo I desta convocatoria, consonte as seguintes bases:

Primeira. *Participantes*

1. O posto de traballo que se convoca pode ser solicitado por persoal funcionario de carreira pertencente ao corpo de tramitación procesual e administrativa, calquera que sexa a súa situación administrativa, excepto que se atope nalgunha das situacións previstas no punto 2, sempre que reúna as condicións xerais exixidas e os requisitos determinados na presente convocatoria na data en que remate o prazo de presentación de solicitudes e se manteñan ata a súa resolución.

2. Non poderán tomar parte na presente convocatoria:

- a) As persoas declaradas suspensas en firme, mentres dure a suspensión.
- b) O persoal funcionario que se atope en situación de excedencia voluntaria por interese particular, durante o período mínimo obrigatorio de permanencia na dita situación.
- c) As persoas sancionadas con traslado forzoso, ata que transcorran un ou tres anos, se se trata dunha falta grave ou moi grave, respectivamente, para o destino na mesma localidade en que se lles impuxo a sanción.



Segunda. *Presentación de solicitudes*

As persoas interesadas deberán presentar as súas solicitudes segundo o anexo II, nas cales farán constar os seus datos persoais, o posto de traballo actual e mais o posto ao que aspiran, no prazo de cinco días hábiles contados desde o seguinte ao da publicación desta convocatoria no *Boletín Oficial del Estado*.

As solicitudes irán dirixidas á Dirección Xeral de Xustiza, da Consellería de Presidencia, Xustiza e Deportes, e presentaranse por vía electrónica na sede electrónica da Xunta de Galicia (<https://sede.xunta.gal>) empregando o procedemento xenérico PR004A e achegando o anexo II coa solicitude.

Canda a solicitude deberá achegarse un currículo e a documentación acreditativa dos méritos alegados para o posto solicitado.

Igualmente, xuntarase á instancia unha memoria asinada na cal, nunha extensión non superior aos cinco (5) folios, o/a candidato/a realizará unha análise das tarefas do posto solicitado e das condicións e medios necesarios para o seu desempeño, facendo constar, así mesmo, propostas de mellora no desenvolvemento das funcións e todas aquelas outras cuestións que o/a aspirante considere de interese ou importancia, con base na descrición das funcións do posto.

A Dirección Xeral de Xustiza ou o/a secretario/a de Goberno poderán realizar unha entrevista persoal ás persoas interesadas.

Terceira. *Resolución e adxudicación de destino*

Esta convocatoria será resolta pola Dirección Xeral de Xustiza, e o nomeamento efectuarase no prazo máximo de dous meses contados desde a finalización do prazo de presentación de solicitudes. Este prazo poderá prorrogarse, excepcionalmente, ata un mes máis.

A persoa designada poderá ser cesada con carácter discrecional pola mesma autoridade que a nomeou.

Tamén poderá renunciar ao devandito posto de traballo mediante unha solicitude razoada en que fará constar os motivos profesionais ou persoais para esta renuncia, sempre que desempeñase o citado posto polo menos durante un ano.



O persoal funcionario que sexa nomeado con carácter definitivo nun posto de libre designación, cando cese no dito cargo será adscrito provisionalmente a unha praza vacante xenérica na localidade onde estaba a prestar servizos, e deberá participar no primeiro concurso de traslados en que se oferten prazas na dita localidade. Neste concurso gozará de preferencia para ocupar as vacantes de carácter xenérico da mesma localidade onde estaba a prestar servizos cando se produciu o seu cesamento.

Cuarta. *Publicación da resolución*

A resolución desta convocatoria publicarase no DOG e mais no BOE, e poderase declarar deserta se se considera oportuno.

Quinta. *Recursos*

Contra a presente resolución, que pon fin á vía administrativa, as persoas interesadas poderán interpoñer recurso potestativo de reposición perante a Dirección Xeral de Xustiza no prazo dun mes contado desde o día seguinte ao da súa publicación no *Boletín Oficial del Estado*, de conformidade co establecido na Lei 39/2015, do 1 de outubro, do procedemento administrativo común das administracións públicas, ou poderán impugnalas directamente perante a sección do contencioso-administrativo do tribunal de instancia competente no prazo de dous meses contados a partir da mesma data, segundo o establecido na Lei 29/1998, do 13 de xullo, reguladora da xurisdición contencioso-administrativa.

Santiago de Compostela, 27 de maio de 2026

José Tronchoni Albert
Director xeral de Xustiza

ANEXO I

Centro de destino: Secretaría de Gobierno					
Código do posto	Denominación	CXP	CE	Corpo	Observacións
XG92589000150307008.13	Tramitación - Xefatura SG na Coruña	3.587,52	11.318,40	CTPA	Dispoñibilidade horaria



ANEXO II
Solicitud de participación

DATOS DA PERSOA SOLICITANTE			
NOME:	PRIMEIRO APELIDO:	SEGUNDO APELIDO:	NIF:
DATA DE NACEMENTO:	ENDEREZO:		
CÓDIGO POSTAL:	PROVINCIA:	CONCELLO:	
TELÉFONO:	TELÉFONO MÓBIL:	CORREO ELECTRÓNICO:	
CORPO:		LOCALIDADE/PROVINCIA:	
POSTO ACTUAL/DENOMINACIÓN:			

SITUACIÓN ADMINISTRATIVA ACTUAL	
SERVIZO ACTIVO	OUTRAS CON RESERVA DE POSTO
<input type="checkbox"/> SI	
<input type="checkbox"/> NON. Neste suposto, conteste o seguinte recadro	

POSTO DE TRABALLO SOLICITADO		
ORDE DE PREFERENCIA	CÓDIGO DO POSTO	LOCALIDADE/PROVINCIA
1	XG92589000150307008.13	A Coruña



MEMORIA

CVE-DOG: nlyfb9g5-xem6-ch82-ik24-yj7houqwwqp0

